

اورش

یغ

منع

نمبر
2

هوزاين

بهاکين يڄ کڊوا چريتا
اورغ يڄ منڄ.

نافي سئورغ جنتن موڏا هق تڄه دوق چاري توجوان
دالم کھيدوفن، فس کسنگن دالم کلوارڪ.

رومه نافي دوق تفي فنتي، ايه دي ماتي دالم
لاؤت، کران اغين ريپوت. نافي دوق دغن ميڄ،
کاکق بتينا نام ليريکا، هق بياس دوق باوه فرينته
کواس جاهت، فس اديق بتينا نام ايني هق اد
کلاکوان سنج هاتي سعمور.

اد بايق فرکارا تيمبول دالم کلوارڪ نافي، سهيڻڪ
دي کنا چپوت ديري کي بوات کرج دغن فق لوغ
دتمفت لائين. بلوم فد نافي تيڻکل کي، کاکق دي
دوق باوه فرينته کواس جاهت لاکي.

فد ساتو هاري، نافي کليق کا رومه، کران ايغت کا
سموا اورغ دالم کلوارڪ دي.

نام ۲ اورغ هق مستحق دالم چریتا این.

1. نافي سئورغ جنتن مودا،
هق چاري توجوان هيدوف ايت
2. ايه باف هق نافي، توان فراهو
3. ميَق ايبو هق نافي
4. ليریکا کاکق بتينا هق دوق باوه کواس جاهت
5. ائيني ادیق بتينا هق هاتي سنغ سعمور
6. فق لوغ کاکق ميَق نافي
7. بينجامين انق فق لوغ
8. حيرام اورغ کرج کلاوت

لیریکا سیار ده

امب ترکجوت بیلا دغر کات لیریکا سیار ده. بالس مان دي بولیه سیار؟ میق اغکیت مکانن کا امب، سبب نمفق امب لته دغن برجالن ماري جائوه. سوده ماکن امب فون ماسوق تیدور سلالو.

فاکي ایسق امب دوق سکیل، دغن سموا فرکارا هق سمالم. فرکارا سوغکوه اتو میمفی؟ امب تیغوق کا بوچو دیندیغ، تمفت هق لیریکا بیاس دودوق، تافی لانی دي تا^۱اد دسیتو ده. دالم رومه فون چوچی مولیق، فینتو ناتغ هق بیاس کاتوق، لانی دوق تربوک ده.

میق دوق بوات مکانن ددافور: تیا^۲ا^۱ینی دغن لیریکا ماسوق جونجوغ بویوغ ایر. لیریکا لتق بویوغ ایت، فس ماسوق کوچوف دداهي امب دغن کاسیه. امب کات: موجور سوغکوه کاء بولیه سیار. لیریکا سپوم کات: ها کاء فون براس بالس ایت جوک. کورو ماري، فس دي بري کاء سیار. امب فکغ تاغن دي دغن سوک هاتي. لفس فد ایت امب کات کا ا^۱ینی: ادیق کي برجالن دفتي دغن ابغ! ا^۱ینی کات کا میق: میق، ا^۱ینی کلیق کوتیف فادي بالیق فتغ بولیه کا دق؟ امب براس ترکجوت، بیلا تاهو کات، لانی کلوارک کیت سوسه سهیغک کنا کوتیف فادي. امب هولور دویت کا میق، فس کات: این دویت هق نافي بولیه ماس کرج دغن فق لوغ. میق امیقله دویت این، سمتارا نافي نق بولیه کرج دسینی. سود کیچیق امب فکغ تاغن ا^۱ینی توبیت کي.

بيلا سمفي دفنتي، کيت فون دوق دسيتو. امب تان
 ايني: جق دماس ابغ کي، اد اف هق جادي دالم رومه کيت
 کاتيقي؟ ايني دوق ديام سبنتر فس کات: لفس ابغ کي، ميقي
 فغکيل بومور هنتو ماري براوبت کاء لاکي، تافي تاء جادي.
 کاء کهور تروق فد دولو، ميقي کنا باير دويت بايق سهيغک
 کيت تاء اد دويت ده. ترفقسا اديق دغن ميقي کنا کي کوتيقي
 فادي هق اورغ تيغکل دبنديغ. فس کنا کوروغ کاء بري دوق
 سئورغ دالم رومه کنف ۲ هاري.

ساتو هاري، کورو ماري دنکري اين. بايق اورغ باوا
 اورغ ساکيت کي کا تمفت دي. اديق مينتاء ميقي باوا کاء کي
 جوک، تافي ميقي تاء سير کي. امب تان ايني فول: فس کاء
 بوليه سيار بالس مان؟ اد سئورغ دالم کمفوغ کيت کي چاري
 توان کورو، فس کورو بري دي سيار. اديق کليقي رويت کا
 ميقي فول، فس کالي اين ميقي فرچاي. ميقي کوروغ کاء دالم
 رومه، بري اديق توغکو دفينتو، فس ميقي کي کا تمفت کورو.

امب تان ايني لاکي: فس کورو ماري کا دق؟ ايني
 جواب: دق، دي تاء ماري. ميقي کات، ميقي تاء ليه ماسوق رافت
 دغن دي، سبب اورغ رامي دوق توروت دي. ميقي ملاوغي
 سود ۲ جالن، مينتاء کورو تولوغي. سود سکالي دي فاليغ
 کيچيقي دغن ميقي. ماس ايت، ميقي تاهو کات توان کورو بوليه
 تولوغي کاء بري سيار. امب تان: فس کاء درومه، جادي بالس
 مان؟ ايني جواب: تکه ايت کاء دوق کلفر. تافي موجور
 جوک، سبب ميقي تمبت دي دغن رنتي، فس کونچي فينتو،
 تاء لام بوبي کاء ملاوغي سوارا دراس، لفس ايت سيف، اديق

کامق. کاء ماتي ده، ادیق دوق تریاق، تافي تاءبراني نق
ماسوق. بیلا میق کلیق، کیت کادوه ۲ ماسوق دالم رومه، فس
نمفق کاء دوق سلق دلنتي. داره توییت دلوک فنوه توبوه دي.
تافي نمفق سروف دي دوق تیدور جندرا ساج.

امب تان: بیلا کاء کابر، دي جادي بالس مان؟ ايني
جواب: فاکي ایت ادیق کي چیدق ایر، بیلا ادیق کلیق،
نمفق فینتو هق بیاس دوق کاتوف، لاني تربوک لواس. ادیق
هوغلک ماسوق دالم رومه، نمفق کاء دوق اتس کریسي، دي
فاکي باجو چوچي چهيا فوتیه، فس میق دوق بوه اوبت
دلوک ۲ دي. ادیق هوغلک ماسوق دکت، کاء فلوق ادیق دغن
کاسیه، ادیق براس سنغ هاتي سوغکوه.

افبیلا سمفي هاري ایسق، ادیق اجق کاء کي چیدق ایر
دتلاک. امب شک هاتي تان: اورغ ۲ کمفوغ بوات بالس مان
بیلا نمفق کاء؟ ايني جواب: مولا ۲ فواق دي فاکت لاري،
تافي ادیق توروت کي هوري کات، لاني کاء سیار ده، دغن
کواس هق توهن. بارو له سموا اورغ فرچاي. اد بایق اورغ
هق ساکیت، فس بولیه سیار دغن کواس توهن. امب تان: فس
تو لاکي توان سائیرین بالس مان؟ ايني سپوم کات: ها، دي
فون سیار جوک. دي بوات جاموان بسر، فس سوروه همب ۲
دي باوا مکانن بایق فرکارا ماري کا رومه کیت. دي کات،
دغن سبب ادیقله هق دوق رویت چارا حال توان کورو، دي
بولیه تمو فس مینتاء تولوغ بري لاکي دي بولیه سیار. امب
دغر حال این، براس سوک هاتي، فس تان ايني: کاء کیچیق
اتو برسائین دغن سیاف کا دق؟ ايني جواب: ها، دي
کیچیق جوک تافي تاءبایق. دي سوک تیغوق سموا فرکارا هق

دوق کليليغ، سروف بودق بارو برانق. امب باغون بردپري،
فس کات: اد بايق فرکارا لاکي هق ابغ براس نق دغر حال
کورو ايت تافي هاري اين ماري کيت کليق دولو. ايني
کات کا امب: کالو بالس ايت، ابغ کليق دولو له، ادیق نق
کي تولوغ ميڤ کوتيف فادي. سود کيچيق ايني فون هوڭکل
کي سلالو. تغه جالن نق کليق، امب تمو دغن سائين سئورغ
هق ايه. دي تکور امب کات: هي نافي! اکو دغر کات مو
کي کرج دکفرناحوم بوکن، فس مو کليق ماري بيلا؟ امب
جواب: کليق دوا هاري ده، امب کي کرج دغن فق لوغ
سمنتارا ساج، تافي لاني براس نق بوات کرج درومه. سائين
ايه کات: موليق، سبب سمو اورغ دالم کلوارک مو، کنا
تومفغ مو. فس مو نق کرج دغن حيرام فول که؟

امب دوق ديام سبنتر، فس جواب: دق! امب براس دي
چريديق بدعه. دي تيفو ميڤ بري جوال فراهو کا دي دغن
هرک موره. تنتو امب تاليه بوات کرج دغن اورغ سروف
ايت. سائين ايه کات: لاني حيرام کاي لبيه فد دولو، سبب
ايه دي ماتي، فس هرت سموا بوليه کا دي سئورغ. دغر دي
بلي فراهو تمبه فول دوا بوتير، تافي تاءاد سياف برکنن کا
دي.

لفس کيچيق بايق فرکارا ده، سائين ايه فون تيڭکل کي
بوات کرج. امب هادف کليق کا رومه، نمفق کاء برديري
دفتو، دي سروف اورغ بارو، هق چوميل سوڭکوه. کاء
کات: نافي مو تاءاکن اف لاکي بوکن؟ ماسوقله، فس کاء نق
سيمفن ماکنن انتوق مو. امب ماسوق ماکن سلالو سبب لافر.

بيلا امب ماكن سوده ده، كائ كات: بڭكالي اديق رويت
سموا فركارا هق جادي ده، ماس مو دوق كرج درومه فق
لوغ. تافي كائ سوڪ هاتي نافي، سبب مو كليق ماري ده.

امب كات: اديق رويت سكت هق دي تاهو ساج، اد
لاكي هق نافي. تائفهم، نافي نق تان كائ بوليه كادق؟ ليريكا
سيوم فس كات: تان له نافي، كائ نق جواب سموا فركارا هق
مو نق تاهو. امب فون تان: ماس كائ نق سيار ايت، كائ بوليه
رويت كا دق اد كجادين اف كاتيقي؟ ليريكا دوق ديام فس
فيكير سبنتر: عيه! فايه نق رويت نافي، ماس ايت كائ براس
فليغ، براس تاكوت، براس فانس سرات توبوه، مپاوا تائليه.
كواس ۲ جاهت دوق مريته اتس كائ، دي فقسا بري كائ تريما
فركارا هق كائ تائسير.

امب تان: فس اف هق كائ نق ايت؟ ليريكا جواب:
فايه نق رويت نافي. بيلا هاتي كائ تمو دغن عيسي، كائ براس
سروف دي جادي تلاك اير هق هيدوف هق بوليه بري كائ
كيغ تائبراس دهاك ده. كائ تيغوق كا مات امب، فس كات:
نافي، كائ براس عيسي له، هق جادي جوړو سلامت دالم
كهيدوفن كائ.

نق بالس جاهت کا حیرام

کلوارک کیت نصیب بایک، سبب فق لوغ هنتر دویت
ماری کا کیت سعمور. لیریکا توبیت فیکیران کات: بایک
کیت فاکي دویت ایت بلی فرکاکس تنون بوات کائین، سبب
کائین ایت مهل فس اورغ کای سوک نق فاکي. کیت فون
مولائی بوات کرج ایت، فس لیریکا دغن ائینی فون باغت
فندی، بوات بری کیت بولیہ دویت چوکوف نق فاکي.

کلوارک کیت دوق سنغ فد دولو، تافی امب براس
هینا کا دیری سندیری، سبب سمو اورغ اد کرج تافی امب
تااد. فد ساتو هاری، ائینی هوغکل ماری رویت: ابغ! ادیق
اد خبر بایک نق رویت! امب تان دی: اد اف ادیق؟ ائینی
کات: تاهو کا دق، هاری این لاکي حق توان سائرین رویت
اف کا ادیق؟ امب مغیلیغ فس کات: ابغ نق تاهو بالس مان
کالو ادیق تارویت. ائینی فکغ تاغن امب کات: لاکي توان
سائرین، نق تمو دغن ابغ، ادیق فیکیر دی نق بری کرج کا
ابغ. امب سوک هاتی سوغکوه ۲ تان کات: سوغکوه که ادیق؟
کالو کیتو ابغ نق کي کا رومه دی سلالو.

افبیللا امب کي سمفی دفینتو رومه توان سائرین ده، اد
همب سئورغ توبیت ماری باوا امب ماسوق دالم رومه. لاکي
حق توان سائرین فون توبیت فس کات: مو جادی کاکق حق
ائینی که؟ امب اغکوق کفلا. فس دی کات: اکو براس سروف
ترلکت هوتغ دغن ادیق مو. کاسیه کسیاغ بلس حق دی باپق
ساعت سهیغک نق بایر تاهاییس. سبب ایت، اف ۲ حق اکو

بوليه بوات انتوق دي، اكو نق بوات. دغر کات، مو دوق چاري کرج بوکن؟ فس لاني دالم کبون زابيت هق اکو، بواه ۲۰ تغه دوق ماسق، مو براس نق کرج دغن اکو کا دق؟ با امب دغر هق دي رويت، امب فون سڱکوف سلالو، دغن تاءکنا فيکير اف لاکي.

امب کي کرج کنف ۲ هاري، دويت هق بوليه، امب بري کا ميڤ ستغه. فس ستغه لاکي امب چادغ تاروه سبب سمفي کا هاري اين فون، امب دوق فيکير لاکي کات، امب نق بالس جاهت کا حيرام، هق بياس بوات بري کلوارک امب سوسه.

ماسوق فرياغ سجوق ده، بوات بري امب اد ماس لواغ فد دولو. امب فون توبيت کي برجالن مائين ۲ دفنتي. امب نمفڤ بودق جنتن سئورغ دوق دالم فراهو هق حيرام، بفکالي جادي اوق ۲ دي. بودق ايت، فالينغ تيغوق کا امب فس تان: مو ماري بوات اف دسيني؟ امب کات: اکو برکنن برجالن مائين ۲ دسيني، مو جادي اوق هق حيرام بوکن؟ دي جواب کات: ها اکو جادي اوق دي، اکو نام يابين، اکو بياس تيغوق، دولو مو بوات کرج دغن حيرام بوکن؟ امب جواب: اکو نام نافي، اکو بياس کرج دغن دي، تافي لاني، اکو تاءجوغ جادي اوق کا اورغ هق جاهت سروف دي. يابين کات: ها مو تاءف، سبب سموا اورغ بوليه بوات کرج، تافي اکو اد ميڤ، اد اديق دوا اورغ لاکي، رويت بتول ۲ اکو فون بنچي کا دي جوک. امب تيغوق مات دي فس تان: يابين، سبب اف مو بنچي کا حيرام؟ يابين جواب: اد سکالي

اڪو ڪي هنتر ايڪن ڊڪڊي، اورغ هق بلي ايت موريه ڪا
 حيرام ڪات، ڊي جوال ايڪن تاءُ ڇوڪوف ڪيلو، فس ڊي
 تاءُ سير بلي ايڪن هق حيرام ده. تافي حيرام چرديق، ڊي
 بوهو غ ڪا فواق ايت ڪات، اڪوله هق چوري ايڪن ڊي ايت.
 فس ڊي ڪاتق اڪو، سهيڻڪ اڪو نق برجالن تائيه بايق هاري
 جوڪ. تافي اڪو جنجي ده دغن هاتي ڪو، ساتو هاري اڪو نق
 بالس جاهت ڪا حيرام. امب سوڪ هاتي، بيلا تاهو ڪات،
 امب اد سائين هق نيات نق بالس جاهت ڪا حيرام سروف
 امب. امب فون رويت سموا فرڪارا بري يابين تاهو، با يابين
 دغر ڊي فون ڪات: ها موليق، ڪالو ڪيت چمفور تاغن، سبب
 اڪو دوق ننتي فلواغ اين لام ده. اقبيل هاري هق اد
 ريپوت، تنتو حيرام تاءُ وييت ڪلاوت، فس هاري ايت ڪيت
 نق باڪر فراهو ڊي بري هابيس. اورغ سروف حيرام مستي
 ڪنا تريما بالسن هق سوغ انتوق ڊي.

لفس ڪيچيق، امب فون ڪليق ڪا رومه. ميڦ تغه دوق
 تنون ڪائين، امب ڪات: ميڦ بوليه برادو سبنتر ڪا دق؟ نافي
 براس نق دغر ماس ميڦ ڪي تمو دغن ڪورو هاري ايت،
 جادي بالس مان؟ ميڦ سپوم فس ڪات: ميڦ فون حيران
 جوڪ، ماس ايت ميڦ هارف سوغڪوه ڪا ڊي، ميڦ هوغڪل
 بلغ ۲ ملاو غ: توان ڪوتو! انق نبي داءُود! مينتاءُ له ڪسياغ ڪا
 امب. امب تان ميڦ فول ڪات: فس ڊي ڪات بالس مان ڪا
 ميڦ؟ ميڦ جواب: توان ڪورو برادو برديري، ميڦ ماسوق
 فڪغ ڪاڪي ڊي فس ڪات: ربي! مينتاءُ تولوغ اڪو ڪاتيق! ڊي
 جواب دغن فرڪتان هق فليق ساعت «تاءُ سوغ نق امبيق
 مڪانن هق انق بري ڪا انجيغ» امب موريه سيڪيت

فس کات: دي کات ميڤ جادي انجيڻ ڪه؟ ميڤ سپوم فس کات: نافي تافهم، توان ڪورو تغه دوق سودي تيغوق هاتي ميڤ کات، ميڤ اد هاتي هق ڪاسيه ڪا دق. سبب ايت ميڤ جواب ڪا دي کات: ها سوڳڪوه توان، تافي تنتو انجيڻ بوليه ماڪن مڪانن هق جاتوه باوه ميڃا هق توان دي. فس مڪانن هق جاتوه ايت، بنديڃ سروف رحمة هق توهن. توان ڪورو ڪاسيه فس ڪسياغ بلس ڪا ميڤ فس کات: «دڃن ڪران ڪفرچيائن مو بايق ڪيتو لالو، بري جاديله ايڪوت ڪهندق مو» ماس ايت، ميڤ تاهو کات دي اد ڪواس بوليه منڃ اتس ڪواس ۲ جاهت، تنتو ليريڪا نق سيار. امب کات: ميڤ! دي اد ڪواس اف؟ فس دي جادي سياف؟ ميڤ فڪڻ ڪفلا امب فس سپوم کات: ميڤ فيڪير کات دي له هق جادي المسيح. دي اد ڪواس هق ڪاسيه، ڪسياغ بلس ڪا سموا مائسي. ڪواس دي لبيه فد سموا ديوا ۲ا ڪيت.

لاري ڪي سکالي لاکي

يابين دغن امب دوق برسائين لام ده. ڪيت اد چادغن
نق بالس جاهت ڪا حيرام. ڪيت بلي ميپق تاروه انتوق نق
باڪر فراهو حيرام. فد ساتو هاري، يابين ڪات: اڪو فيڪير
مالم ايسق جادي مالم هق موليٰ ڪالو ڪيت نق بوات چادغن
ايت، سبب بولن ڪلف. امب تان: نق بوات اف ڪالو دي شك
هاتي اتس ڪيت؟ يابين جواب: اورغ سروف حيرام دي اد
سترو باپق، تنتو دي تاءُ شك ڪا بودق مودا سروف ڪيت. فس
ايسق مو نق ماري ڪا دق؟ امب جواب: تنتو اڪو نق ماري!
فس ايت ڪيت ڪليق ڪا رومه ماسيغ ۲.

فاڪي ايسق، امب دوق فيڪير چارا حال ايت لاکي،
سبب امب تاءُ بياس بوات جاهت سروف ايت. امب ڪي
برجالن مائين ۲ دفنتي، فاڪي باجو تيل، سبب براس سجوق.
امب برکنن فاڪي باجو اين هق بينجامين بري ڪا امب. فس
تاءُ اد جوال دسيني، ملائڪن دڪاليل ساج.

دڪت نق ڪلف، امب ڪادوه ۲ ڪي ڪا تمفت هق جنجي
نق تمو دغن يابين. ڪيت ڪنا دوق دسيٽو لام ننڍي بري
ڪلف دولو. فس يابين ڪات: سبب اف مو فاڪي باجو تيل
سروف اين؟ فايه نق هوغڪل، فس ڪالو مو تيغڪل اورغ نق
تاهو ڪات باجو مو! امب جواب: تاءُ ڪنا بوسن يابين اڪو نق
ايڪت باجو دفيغڪڻ. يابين باغون ڪات: ماريه! سمفي ماس
ده. امب ڪهور ۲ توروٽ يابين. امب چابوت باجو، لتق
دباليق بلاڪڻ. يابين چوچوه افي، مپالا باڪر فراهو حيرام.

کیت کدوا لاري تیڅکل سلالو، سمفي کا تمفت هق
 جنجي نق تمو. یابین تان: مان باجو تبل مو؟ امب براس
 ترکجوت. یابین کات: مو تیڅکل باجو دکت فراهو بوکن؟
 امب اغکوق. یابین هوندور سلالو فس کات: کالو کیتو، اکو
 تائیه دوق دکت مو، بیلا اورغ نمفق باجو ایت، دي نق تاهو
 سلالو کات، مو هق بوات سموا فرکارا این، فس اکو نق
 سوسه سوغکوه. لفس ایت یابین فون تیڅکل امب کي.

امب براس تاکوت سوغکوه^۲، تاکوت سموا اورغ نق
 حکوم اتس امب. امب هوغکل کي دغن دراس نق بري لفس
 فد کمفوغ ایت باعث^۲. امب برجالن لڅکه بوکیت^۲ هالوس
 باپق بوتیر دغن تائبراس لتيه. امب ایغت کا میق، لیریکا، فس
 اینی. دوسا هق امب بوات بچیق ایب بري جائوه فد فواق
 دي.

امب بنچي کا کورو ایت. تافي امب ترايغت کا ساتو
 فرکتان هق سئورغ بودق جنتن بیاس رویت کات: فرکارا
 هق مستحق سکالي یائیت، کیچیق هق سوغکوه، کاسیه دغن
 بري معاف مو اکو. فرکارا ایت نق بري کیت براس سنغ دالم
 هاتي. امب براس سروف دوق سئورغ، تافي امب فون تاهو
 کات توان کورو دغن صحابه دي تنتو تائ کي باکر فراهو
 اورغ لاین. فرکارا اینیله بوات بري امب توبیت ایر مات.

جاموان فسخر

تاءلام امب فون سمفي کا رومه هق فق لوغ. امب بوهوغ کا فق لوغ کات، درومه فايه نق چاري کرج، سبب ايت کنا کليق ماري کرج دغن فق لوغ سمولا. فس فق لوغ فون سمبوت امب دغن سوک هاتي.

بينجامين رويت کات، تاءلام ده نق ماسوق فرياغ جامون هق مستحق، انتوق اورغ يهودي. فس کيت کنا باوا، ايکن ماسين، کي جوال دکوت يروسليم. لاني سموا اورغ دوق برکادوه چوچي رومه ماسيغ^۲، انتوق جاموان فسخر. تافي امب تاء فهم سبب اف فواق دي دوق برکادوه کيتو لالو. فد ساتو هاري، امب دغن بينجامين کي برجالن دتفي سوغي، بينجامين رويت سموا سجاره دولو^۲ هق امب تاءبياس تاهو، رويت حال بغسا دي کنا جادي همب اورغ مصير، حال بالا^۲ سفلوه فرکارا، فس مالم هق دهشت سکالي، ماس ملکيلموت ماري نق امبيق پاوا سموا هق جادي انق سولوغ دالم نکري مصير. تافي اتس رومه هق اد داره ليسيق دکليغن فينتو، ملکيلموت لثکه لالو لغسوغ کي. فس فد مالم ايت جوک، فواق اسرائيل بوليه لفس فد تاغن راج مصير، کليق کي دوق دنکري هق توهن جنجي ايت.

بينجامين رويت لاکي کات: کيت دسيني تاءسمبله بيریغ ده، تافي دکوت يوساليم دوق بوات لاکي. بيریغ هق نق سمبله ايت کنا جادي بيریغ هق تاء^۲ اد چاچت تاء^۲ اد چدرا. امب تاڻ بينجامين کات: سبب اف کنا فيليه بيریغ سروف ايت؟ بيریغ کنف^۲ ايکور اد داره چهاي ميره بوکن؟

تاء ڪنا ڪيرا بيريج ايت سمفرن اتو دق! بينجامين ڪات: مو
 تاء فهم لاکي نافي، بيريج ايت مستي تاء اڌ چاچت، تاء اڌ
 چدرا، سمفرن سوڳوه. ڪالو تاء سمبله بيريج، اڪو سنديري
 هق ڪنا ماتي. امب تريڪجوت: اف! مو ڪه هق ڪنا ماتي؟
 بينجامين جواب: ها مو تاء ايت چريتا هق اڪو رويت سائي،
 مالم ملڪيلموت لالو ايت، ڪنا سمبله بيريج، ڪالو تاء بوات،
 سموا انق سولوڻ ڪنا ماتي. ڪالو اڪو اڌ فڌ زمان ايت، اڪو
 فون ڪنا ماتي جوڪ، سبب اڪو جادي انق سولوڻ. امب دوق
 ديام، براس تاء فهم هق بينجامين دوق رويت ايت.

ڊڪت نق ڪلف ده، بينجامين فون اجق امب ڪليق. تغه ۲
 دوق برجالن ڪيت تمو عسڪر دوا اورغ. امب ڪادوه ۲
 منوسوف باليق فراهو، سبب براس ٽاڪوت. بيلا بينجامين
 تيغوق، دي سوڪ فس ڪات: اف هق مو بوات؟ ڪالو اورغ
 تيغوق، نق فيڪير ڪات، مو اڌ بوڪو هق بوات ساله. امب
 ڪات: مو ڪنا برسومفه دغن جنجي دولو بينجامين، ڪالو اڪو
 رويت، مو ڪنا جنجي تاء رويت ڪا فق لوڻ. بينجامين فون
 برسومفه سلالو، فس امب رويت سموا فرڪارا بري دي دغر.

افبيلا بينجامين دغر، دي فون فلوق باهو امب فس
 ڪات: تنتو فواق ايت تاء تورتو چاري مو سمفي دسيني،
 بفڪالي دي تاء شڪ اتس مو. فس بيلا مو بولي بهالس ڪا دي
 ايت، مو براس سنغ هاتي ڪه؟ امب ڪات: تنتو بينجامين،
 اورغ جاهت سروف حيرام، سوڻ فاتوت ده تريما بالسن
 ايت. فس ڪالو مو، مو نق سنغ هاتي ڪا دق؟ بينجامين دوق
 ديام، فس ڪات: بفڪالي سروف مو، تافي اڪو فون تاء تنتو،

سبب توان کورو زويت کات، کيت نق بوليه سنغ هاتي، کالو کيت جوغ منعاف کا اورغ، فس بوات بايک دغن دي. اکو فون شک هاتي لاکي کات، هق دي رويت ايت سوغکوه کا دق؟ مو تاهو کا دق بينجامين لاني کورو ايت دوق دمان؟ بينجامين جواب: اکو تاهو جوک. اد اورغ رويت کات، تمو دي دکوت يروساليم، اد هق کات دي دوق دکمفوغ بيت عني. بايق اورغ رويت حال فرکارا عجائب هق دي بوات ده. فواق دي فاکت نق اغکيت دي بري جادي راج، تافي دي کي کو لائين تاتريما. امب براس نق تاهو لاکي حال کورو ايت، تافي هاري ايت کيت کنا کليق سلالو، سبب دکت نق کلف ده. با سمفي هاري بوات جاموان فسخر، امب تاهو کات، تو دغن ميقي هق بينجامين، تاء برکنن بري امب ماکن سکالي دميچا دي. سبب ايت امب توبيت فد تمفت ايت، برجالن مائين ۲ سفنجغ هاري.

دکت نق کلف ده، بگکالي جاموان فسخر درومه فق لوغ سوده ده. امب فون کليق بلغ ۲ دوق فيکير: عيسي اد کواس بوليه منع اتس کماتين، بوليه بري سيار اورغ ساکيت، بوليه همبت کواس ۲ جاهت. اد ليم فولوه هاري لاکي، فق لوغ نق باوا امب کي کا کوت يروسليم، بگکالي امب نق بوليه تمو دغن دي دسيو. سبب لاني امب تاهو ده کات، عيسي جادي راج، جادي توان هيدوف، تافي اتس امب سنديري امب تانتو لاکي.

کجادين هق فليق

فاکي ايسق امب باغون کادوه ۲، سبب تغه هاري ده، سيمفن مندي فس کي چاري مکانن ددافور. بايق اورغ فاکت دوق ماکن دميچا، تافي فق لوغ دغن بينجامين تاءد، بگکالي توبيت کي کلوار. سموا دسيتو فاکت دوق دغر ادیق مق لوغ هق نام ليعه دوق رويت: اورغ دوق دالم قبور امفت هاري ده! جادي سوغکوه، اد بايق اورغ تيشوق. مق لوغ کفر تاغن، موريه کات: تنتو اکو تافرچاي حال اين! ادیق مق لوغ فاليغ تان کات: کائون تافرچاي که؟ تافي امب فرچاي.

سموا دميچا سيف، فس بودق بتينا سئورغ کات: کالو امفت هاري ده دي دوق دالم قبور، مستي مایت دي نق بوروق ده! تافي ادیق مق لوغ جواب کات: ها کاکق بتينا اورغ هق ماتي ايت کات بالس ايت جوک، تافي توان کورو تادغر. دي سوروه فواق صحابه کوليغ توبيت، باتو هق دوق کاتوف فينتو قبور ايت. لفس ايت کورو فغکيل اورغ ماتي دغن سوارا درس کات: «لازرو! لازرو! توبيت ماري له.» فس مایت اورغ ماتي فون توبيت ماري دغن کائين کافن هق دوق باروت توبوه دي. سموا اورغ فاکت تاکوت، تافي کاکق دي هوغکل کي سمبوت ادیق دي دغن سوک هاتي. لفس فد ايت کورو کات: «بواغ کائين کافن ايت، فس باوا دي کليق.»

سموا اورغ دوق ديام. لفس ايت اد سئورغ کات: سموا هق رويت ايت، تيشوق سنديري کادق؟ ادیق مق لوغ جواب: دق، سبب فرکارا اين جادي دکمفوغ بيت عني، فس

دسيټو جائوۍ ساڻت دغن رومه هق اكو، تافي اكو دغر اورغ
 دسيټو رويت، سروف بلاك. بايق اورغ كات، عيسي جادي
 المسيح، جادي جوړو سلامت هق توهن جنجي ايت.

دغر سكت ايت، امب فون باغون توبيت كي كا لوار.
 فس نائيك فراهو هالوس كي كا تمفت هق امب دغن بينجامين
 سوڪ كي سعمور. بينجامين رويت بايق فركارا چارا حال
 عيسي، دولو ۲ امب تافرچاي. تافي لاني اد بايق فركارا هق
 بوات بري امب فرچاي.

افبيللا سمفي دسيټو امب فون نائيك، فس تيغوق اد
 بودق ۲ دوا تيك اورغ دوق مائين، اد بودق هالوس سئورغ
 دوق كوتيف بوغا دكت ۲ دغن امب. تيبا ۲ امب براس اد
 فركارا فليق جادي دسيټو. ماس اين تغه هاري، تافي لاغيت
 كهوړ ۲ كلف، سهيڅك تائتمفق اف. امب دغر سوارا بودق
 سئورغ دوق ترياق، بڅكالي بودق هق دوق كوتيف بوغا
 سائي. امب براس بيمبغ كا دي، كالو دي هادف كا فنتي،
 تننو نق جادي بهيا. امب ملاوځ: اديق دوق دمان؟ بودق
 ايت جواب بلغ مغيسق كات: دوق سيني! امب ملاوځ
 سكالې لائي؛ اديق دوق ديام ۲، فس فڅكيل ابغ سعمور، ابغ
 نق نوروت سوارا كي تمفت اديق. امب برجالن كاكل دالم
 كلف، سروف اورغ مات بوت، سود سكالې امب تمبو بودق
 ايت، امب ريبا دي سبب توبوه دي دوق كتر كران تاكوت.
 دي تان كات: ابغ! سبب اف كلف باغت ساعت؟ اديق كامق
 تغه هاري لائي، دوا اورغ ايت لاري كليق، تيڅكل اديق
 سئورغ. سبب اف ايه تاءمري چاري اديق؟ فس بيللا نق چره؟

بولن دغن بينتغ فون تاءاد. تافي ماس اين تغه هاري بوكن
ابغ؟ امب جواب: ها تغه هاري، ابغ فون تائاهو جوڪ
سبب اف جادي بالس اين، بگكالي سبنتر لاگي نق چره.

بودق ايت دوق ديام سبنتر. امب اجق دي كيچيق بري
دي هيلغ تاكوت: اديق بيلاس دغر كورو عيسى مفاجر كا
دق؟ بودق ايت جواب دغن سوڪ هاتي كات: ها بيلاس،
سموا دالم رومه كيت كي بلاك. توؤ اكو تائليه برجالن، تافي
كورو تولوغ بري توؤ بوليه برجالن. فتغ ايت تاءاد سيف نق
كليق، سموا اورغ براس نق دوق سكالي دغن دي، تافي كيت
سموا براس لافر جوڪ. لفس فد ايت دي سوروه كيت
دودوق، فس دي بهاكلي مكانن كا كيت، اورغ هق دوق
دسيتو، لبه كورغ 5000 اورغ، تافي كيت سموا بوليه ماكن
كپغ، فس اد هق لبه لاگي. فس ابغ تاهو كادق، كورو عيسى
كاسيه كا بودق ۲، دي كاسيه كا سموا اورغ، فس سموا اورغ
فون نق سنغ هاتي. سوارا بودق ايت سيف ده، امب توندوق
تيغوق موڪ دي، نمفق دي تيدور جندرا، سبنتر امب فون
بوليه نمفق سموا فركارا كليليغ توبوه، چره كليق ماري ده،
بوكن چره سروف ماس فاكلي، هق كهور ۲ سولوه، تافي دي
چره دغن سرت مرتا.

امب دغر سوارا اورغ جنتن، دوق ملاؤغ فغكيل انق
دي. با دي نمفق امب، دي هوغكل ماري، فس سمبوت
انق دي دغن سوڪ هاتي. دي تان امب: مو بوكن اورغ
يهودي كه؟ امب مغيليغ: دق! امب جادي اورغ سيريا، تافي
فق لوغ برييني دغن اورغ يهودي دكفرناحوم اين. دي تان:

مو دوق دکفرناحوم لام مان ده؟ امب جواب: تالام، امب دوق سمنتارا ساج. کیت کدوا سیف سبنتر، فس امب کات: امب تائفهم کجادین سائنی. اورغ جنتن ایت جواب: اکو فون نق رویت تائگنا، بئکالي جادي سروف دغن هق نبي یوئیل بیاس رویت، «متهاري نق توکر جادي کلف، چهيا بولن نق نمفق سروف داره، بلوم هاري هق ربی نق ماري ایت.» تافي اکو تائاهو، هق جادي کلف سائنی، توجو کا هاري ایت کا دق.

دي دوق دیام سبنتر، فس کات: هاوغ دوق دکفرناحوم بیاس دغر چارا حال کورو عیسی کا دق؟ امب جواب: ها تاهون دولو امب دغر سعمور، تافي تاهون این کورغ سیکیت، دغر اورغ هق ماري دیروسلیم کات، دي دوق بوات فرکارا عجایب دسیتو. دي اغکوق کفلا فس کات: ها بئکالي دسیتو له دي نق فدیري کراجان دي. سوئکوه کیت بیاس نق اغکیت دي جادي راج دسینی، تافي دي تائجوغ، دي کي کو لاین. اکو فیکیر عیسی جادي جوړو سلامت هق توهن جنجي ایت. لفس دي سود کیچیق دي فون مینتا دیری کلیق کا رومه. امب فون فالیغ نایک فراهو هادف کلیق. با سمفي درومه فق لوغ، امب نمفق مق لوغ ددافور، امب فون تان: مق لوغ! مق لوغ بالس مان، تکه جادي کلف ایت؟ مق لوغ تیغوق کا امب دغن موک فوچت فس کات: جادي کلف جق دتغه هاري، سمفي فوکول تیکک. اد اورغ رویت کات، کجادین این دوق رویت کا بالا هق دهشت سوئکوه، سهیغک متهاري فون کنا تیغکل فد مائسی. امب دوق دیام تائجواب اف سکارا.

متهاري دکت نق جاتوه ده، تافي سمو اورغ نمفق
تاءځادوه نق بوات اف. اورغ جنتن دوق کيچيک دساتو
تمفت، اورغ بتينا فول دوق کيچيک راليب دتلاک.

لفس فد ايت، اورغ هق ماري دکوت يروسليم، ماري
سمفي کا کمفوغ کيت. تافي نمفق فواق دي سوسه هاتي،
مالس نق کيچيک دغن سياف. سود سکالي کيت بوليه دغر خبر
تائبائيک هق جادي دکوت يروسليم. کتوا ۲ اورغ يهودي
فغکيل فواق دي ماري برهيمفون، اد اورغ هق کنا ايکت،
بومي ترکوچق، لاغيث جادي کلف، کائين تابير دالم بيت
المقديس چاريق امبيق داتس سمفي کا باوه جادي بله دوا.
فس اد سئورغ تاڻ کات: توان کورو دوق اد دسيتو کا دق؟
اورغ ايت. جواب: تنتو دي اد، فس دي هق مستحق سکالي
فد هاري ايت، سبب فواق ايت ايکت عيسي، فس فاکو دي
دکايو امفت چابغ، ماتي دسيتو.

بوليه منع اتس ڪماتين

لاني بارو امب تاهو ڪات، ڪورو عيسيٰ مستحق سوڻڪوه
دالم ڪهيدوفن امب، ولو امب تائياس برتمو دغن دي فون امب
فرچاي دغن تاءُ شڪ هاتي ڪات، دي ايت جادي اورغ هق بوليه
منع اتس سموا ڪواس دالم دنيا ولو حڪوم ماتي فون. تافي ڪالو
دي اد ڪواس بوليه منع اتس حڪوم ماتي، سبب اف دي سنديري
ماتي؟ با امب فيڪير بالس ايت، بوات بري امب براس فوتوس
هرافن.

امب دوق ڪرج درومه فق لوغ لاکي، براس تائسير فيڪير ده
حال ڪورو ايت. امب سوڪ بوات ڪرج سروف اين دغن تاءُ اد
ماس لواغ، سبب تاءُ ڪنا دوق فيڪير باق. با امب لتيه، امب فون
بوليه تيدور دغن راليب.

بينجامين دغن اديق دي يوئيل هارف ڪات نق بوليه ڪي ڪا
ڪوت يروسليم دالم فرياغ راي 50 هاري. ڪنف ۲ تاهون، فق لوغ
دغن بينجامين نق ڪي جوال ايڪن ماسين دسيتو، تافي تاهون
اين، فق لوغ نق بري بينجامين جاڪ درومه، سبب لاني
بينجامين فندي سموا ده. فس فق لوغ تان امب: نافي نق ڪي
سڪالي ڪا ڪوت يروسليم ڪا دق؟ امب جواب: ڪالو بوليه تولوغ
فق لوغ، امب فون نق ڪي فد هاري فق لوغ نق ڪي ايت.

هاري ايت تاءُ سمفي لاکي. فد ساتو فاکي، امب نائيڪ
فراهو ڪهور ۲ ڪي دغن تاءُ ڪادوه. تيبا ۲ ڪيت نمفق دوا اورغ
جنتن دوق دتفي فتتي، بينجامين ڪات: نمفق سروف يحيا دغن
يعقوب، دي هق بياس تيغڪل فراهو دي ڪي توروت ڪورو عيسيٰ

بڳکالي دي نق کرج کلاؤت سمنولا. امب کات: تائسه دوق
فادول له کا دي، اکو تائسير دغر حال اين ده! تافي
بينجامين کات: يحيا دغن يعقوب بايک دغن کلوارک کو،
فس دي فون نمفق کيت، تنتو اکو کنا ماسوق تکور دي.

بينجامين هادف فراهو کي کوء دوا اورغ ايت. با سمفي
بينجامين ماسوق تکور: سلامت برتمو ابغ يحيا، کيت سوک
هاتي ابغ کليق ماري. ابغ يحيا نق کرج دغن کيت کا دق؟
يحيا مغيليغ کفلا. امب براس شک هاتي سبب تائنفق، دي
دوق سوسه هاتي اتس کماتين کورو عيسى. يحيا جواب:
دق! سمالم کيت توبيت کلاؤت ده، فس بوليه ايکن بايق.
سمالم جادي کالي هق سود اتس کرج اين. کيت کنا کليق کا
کوت يروسليم دولو، فس کورو عيسى سوروه کيت کي تمو
دغن دي دکاليل.

امب دغن بينجامين ترکجوت. بڳکالي يحيا سوسه هاتي
دغن کران کورو هق دي ماتي، بوات بري دي تيفو ديري
بالس ايت. فس يحيا کات لاکي: بڳکالي مو کدوا تاء تاهو
لاکي کات، کورو عيسى دوق هيدوف کليق ده. فاکي اين
دي دوق ماکن سکالي دغن کيت دسيني. يحيا تونجوق اتس
باتو هيتم هق دي بوات دافور. فاکي اين توان کورو کيچيق
دغن فيتروس بايق فرکارا دتفي فنتي اين.

امب براس حيران اتس سموا فرکارا هق يحيا رويت.
امب تان يحيا: فواق ايت تاءفاکو دي دکايو امفت چابغ که؟
يحيا جواب: دي کنا فاکو دکايو امفت چابغ. اکو سنديري
دوق تيغوق دي سلام انم جم. امب کات: سود سکالي فواق

ايت لفس دي تورون، دي تاڪنا بونوه بوڪن؟ يحييا ڪات:
 دي ماتي سوڳڪوه، فس فواق اڪوله هق باوا مايت دي ڪي
 تازوه دالم قبور. تافي ڪماتين تاءِ اد ڪواس بوليه منڻ اتس
 عيسى هق يڻ هيڊوف. سبلوم دي ماتي، دي دوق اجر ڪيت
 بايق ڪالي ده، چارا حال دي. نق هيڊوف ڪليق. تافي ڪيت
 تافهم لاکي ماس ايت.

امب تان لاکي: تافي ڪالو ڪورو عيسى اد ڪواس اتس
 ڪماتين سوڳڪوه، سبب اف دي سنڊيري ڪنا ماتي؟ سبب اف
 دي بري عسڪر روم ماري ايڪت دي؟ ڪالو ڪيتو فواق عسڪر
 روم منڻ اتس دي سبب سود سڪالي دي ڪنا بونوه بوڪن؟
 تافي يحييا جواب: فواق ايت تائيه منڻ اتس دي، سوڳڪوه
 ماس ايت نمفق سروف فواق ايت منڻ. اڪو سنڊيري فون
 ترياق دغن سديه هاتي.

فواق ايت بنچي، مڻجيج دغن لوده اير ليور، تافي
 عيسى دوق ڪاسيه ڪا فواق دي لاکي. فد ماس ڪنا فاکو
 دتاغن، دڪاڪي فون دي دوق بردعا ڪفد توهن ڪات «يا
 باف، امفونله ڪا فواق اين، هق نق بونوه اڪو
 اين! دي تاءِ تاهو ڪات، فربواتن دي ساله سڪت
 مان!» ڪاسيه هق عيسى بوليه منڻ.

فس يحييا ڪات: اڪو مينتاءِ ڊيري دولو، تاڪوت سائين ۲
 دوق ننتي. دي سپوم ڪا ڪيت فس باغون ڪي سلالو. امب
 دغن بينجامين فاليج تيفوق ڪا باتو هق هيتم، اد بارا افي، اد
 تولغ ايڪن دسيتو. بينجامين بيسيق سروف اورغ هق جاڪ
 ميمفي ڪات: دسيني! فاکي اين! نافي ڪيت ڪنا ڪي رويت

بري سموا اورغ تاهو. امب تائاهو بينجامين نق كي رويت
كا سيف. امب نمفق بينجامين كايوه فراهو كادوه، هادف
كليق كا رومه. با سمفي، كيت فاكٽ اٽكوت بكس ايكن تاروه
باليق بلاكغ رومه. ماس ايت مق لوغ دوق كيچيق دغن اديق
دي نام ليعه، هق ماري دكوت يروسليم. مق لوغ موريه نمفق
كيت ماسوق دغن تاء سالين، تاء باسوه موڪ. بينجامين كات
دغن سوارا درس: كورو عيسى دوق اد لاکي! دي هيدوف
كليق! ابغ يحيا دوق ماكن سڪالي دغن دي دفتي فاكي اين!

مق لوغ باغون موريه: برهنٽي كيچيق حال اين،
بينجامين. کالو مو كيچيق لاکي، ميٺ نق رويت کا تو
سوروه دي کودم مو. مو سروف دغن ايه مو، نق لاون دغن
تو سعمور، دوق فرچاي کا اورغ منيفو ايت. فس دي
موريه کا مق سودارا کات: مو فون سروف ليعه. مو کليق
له! فس جاغن ماري دسيني فول. سود كيچيق بالس ايت مق
لوغ باغون توبيٽ دغن موريه. مق سودارا نام ليعه سائي،
فکغ باهو بينجامين دغن سوک هاتي کات: تنتو نق جادي
بالس اين، سبب کورو عيسى رويت ده بلوم فد دي ماتي
کات: «اکو له هق بري مائسي هيدوف.» فس دي
هق بري مائسي هيدوف، بولي ه دوق ماتي که ؟ سوغکو هله
بينجامين، عيسى دوق هيدف لاني.

برجالن جاءوه

لاني امب فرچاي ده کا عیسی، سبب امب نمفق کهیدوفن
سموا اورغ هق هازف کا دي، توکر جادي موليقي. سموا اورغ
هق دغر خبر کات عیسی هیدوف کلیق ایت، فاکت سوک هاتي
سپف ۲، سبب کورو ۲ تورات لارغ تائسیر بري کیچیق.

تائلام نق سمفي کا فریاغ رای 50 هاري. فق لوغ باوا امب
دغن یوئیل کي سکالي کا کوت یروسلیم، تافي بینجامین تاء کي
دغن کیت کالي این. کیت برجالن کي دغن اورغ ۲ هق نق کي
دستو جوک.

کیت برجالن کو کمفوغ ۲، بندغ، چله ۲ بوکیت. با تغه
هاري، امب نمفق یوعل برجالن لمبت ۲ سبب لتیه. کیت ماسوق
برادو دباوه بایغ فوهو غ کایو، فق لوغ امبیق روتي دغن ایر
بواه جابیت بري کیت ماکن، سوده ده، امب دغن یوئیل فون
تیدور فس جندرا سلالو.

دکت نق کلف فق لوغ کرق کیت، سبب کنا برجالن کي
لاکي، کیت کنا کي بري سمفي کا نصره بلوم کلف، سبب دستو
کیت بولیه تیدور درومه واریس هق مق لوغ.

افیلا سمفي، سموا اورغ دالم کلوارک ایت فاکت توبیت
ماری سمبوت کیت، انق سولوغ دالم کلوارک این نام ایسحاق،
عمور دي سام توا دغن یوئیل، دي باوا کیت کي برجالن دکدي.
کیت لالو کي کو کدي بوات دنیغ لمبو، بگکالي دنیغ ایت تاء
فادن، بوات بري تکق لمبو توبیت داره. ایسحاق کوسق کفلا

لمبو ايت دغن كسياغ بلس فس كات: دولو تکه عيسى جادي توکڻ کايو دسيني، تاءاد دنيغ هق بوات بري لمبو ساکيت، سبب دي فندي بوات، تافي لاني دي تاءاد ده، فواق ايت بونوه دي! هاري اين امب بارو تاهو کات عيسى بياس جادي توکڻ کايو.

ايسحاق باوا کيت کليق کا رومه دي، ماس ايت مکانن سيف ده، کيت فون ماسوق ماکن سکالي دغن کلوارک دي. با سوده ماکن ده، ايه ايسحاق تان امب، ايسحاق باوا کي تيغوق اف سائي؟ امب جواب: بايق تمفت، سود سکالي دي باوا کيت کي کڏاي بوات دنيغ لمبو. عيسى بياس جادي توکڻ کايو دنصرة اين؟ سمو اورغ نمفق سروف سوسه هاتي، فس تو کات: ها سوڻکوه، چي يوسف ايت، دي جادي توکڻ کايو هق فندي، تافي عيسى ليه فندي لاکي. امب تان: فس کلوارک دي دوق دسيني که، تو؟ دي جواب: ها، سبب تو دغن چي يوسف دوق برسائين لام، مريم مق عيسى فون، تو کئل جق دکچيق ۲ لاکي.

يوسف دغن مريم کي منيکاح کو باليق هولو، لفس فد ايت، امفت تاهون بارو دي کليق سکالي دغن انق جنتن. عيسى ايت دي جادي بودق هق چرديق، مولا ۲ دي کرج جادي توکڻ کايو سروف ايه دي، تافي تالام دي بري اديق دي جاڻ، فس دي سنديري تيغکل کي.

فق لوغ تان تو کات: عيسى کليق ماري دسيني کا دق؟ تو جواب: ها دي بياس کليق سکالي، تافي سمو اورغ تاء تريما دي، فواق دي فاکت نق بونوه دي، تافي تاءبرجاي.

تو فاليغ تان ايه ايسحاق: مو دوق دسيو هاري ايت،
 مو تاهو کا دق سبب اف فواق ايت نق بونوه عیسی؟ ايه
 ايسحاق جواب: سبب کورو عیسی مڱاکو کات، دي جادي
 المسيح هق توهن جنجي ايت، بوات بري فواق کورو ۲
 تورات فاكت نق بونوه دي بري جاتوه دتوبير بوکيت. تافي
 فليق، کورو عیسی بوليه بري سلامت ديري دي دافن فواق
 ايت.

سموا سيف دغن فاکي فيکيران، لفس ايت ايه ايسحاق
 کات: تغه مالم ده، بوليه ماسوق تیدور. یوعیل، نافي، بوليه
 تیدور بالیق اتس دغن ايسحاق. سموا فاكت ماسوق تیدور
 دتمفت ماسیغ ۲. فاکي ايسق، کيت باغون فاکي ۲، کادوه ۲
 ماکن مکانن، اوچف سلامت تیغکل دغن توان رومه، فس
 برجالن کي لاکي. اد باپق فواق هق برجالن کي سکالي دغن
 کيت، تغه ۲ دوق برجالن ايت، اد هق دوق بردعا، اد هق
 دوق مپاپي فوجي کا توهن، بوات بري فرجالنن هق کيت
 تاءکسيت. با ماسوق کا بندر یریکو، فق لوغ باوا کيت کي
 چاري بيلیق سیوا، لفس کيت ماکن، کيت تیدور سلالو.

یوعیل جندرا، تافي امب دق لاکي، براس فانس. امب
 باغون کي کا تمفت فق لوغ، نمفق سموا اورغ دوق کيچیق
 دغن مناریق هاتي. فق لوغ تان: کورو عیسی بیاس ماري
 دسيني کا دق؟ توان رومه جواب: بیاس، ماس ايت باپق
 اورغ توبیت ماري سمبوت دي، سبب نق تیغوق دي بوات
 فرکارا عجائب.

تافي سایغ، کورو کي برادو درومه اورغ جاهت، هق

ڪرج چوڪي، ڪوتيف ليه فد فاتوت، سهيڻڪ ڏي ڪاي. توبوه
 ڏي رنده، ڏي نام زاڪي. فس اد سئورڻ هق دوق دغر تان:
 ڪورو برادو درومه ڏي ڪه؟ توان رومه رويت ڪات: تاء
 سياف نق برسائين دغن زاڪي، سموا اورڻ بنجي ڪا ڏي. تافي
 فد هاري ڪورو ماري ايت، زاڪي نائيڪ اتس فوهون ڪايو نق
 تيفوق ڏي. بتولن لالو ڪي ڪو ايت، ڪورو عيسيٰ برادو
 ڪيچي دغن زاڪي ڪات، نق ڪي برادو درومه ڏي.

افبيل اورڻ رامي دغر هق ڪورو ڪات، فواق ڏي فاڪت
 موريه. تافي اد فرڪارا فليق هق جادي دسيٽو. فق لوڻ تان:
 فرڪارا اف؟ توان رومه جواب: زاڪي هق سموا اورڻ بنجي
 سائي، دوق برجالن ڪليليغ بندر، فس ڪي ڪرتوق فينتو رومه
 سموا اورڻ. مولا ۲ تاء سياف بوڪ فينتو ڪا ڏي، سبب فيڪير
 ڪات زاڪي ماري نق ڪوتيف دويت سروف دولو. تافي دق!
 زاڪي دوق چاري اورڻ ۲ هق ڏي بيلاس تيفو. فس نق بري
 ڪليق دويت ايت ڪا ڏي، امفت ڪالي ڪندا. هرت هق ڏي
 ستغه فون ڏي بري ڪا اورڻ ميسڪين.

سموا اورڻ هق دغر دوق ديام دغن فاڪي فيڪران ڪات،
 ڪورو عيسيٰ اين سياف بوليه توڪر هاتي اورڻ بري جادي
 موليق؟ فس اد سئورڻ ڪات، ڏي بوات فرڪارا عجائب
 دسيني ڪا دق؟ توان رومه جواب: بيلاس، ڏي بري اورڻ مات
 بوت بوليه نمفق، اورڻ تيفق بوليه برجالن. لاني سموا اورڻ
 هق ڪورو بيلاس تولوڻ، دغن اورڻ ۲ هق دوق توروت ڏي
 فاڪت ڪي ڪا ڪوت يروسليم، ننتي نق تيفوق ڪجادي هق
 مستحق دسيٽو.

اغين سجون فوفوت ماري، بوات بري امب براس
مغنتوق، امب كهوور ۲ باغون توبيت فد تمفت ايت، فس
ماسوق دالم بيليق تيدور، سبب ايسق كيت كنا هوبوغ
برجالن لاكي، بارو نق سمفي كا كوت يروساليم. فس بيلا
سمفي دسيتو امب فون نق ننني تيغوق كجادين هق مستحق
ايت، تافي امب تاءاهو لاكي كات، كجادين هق مستحق
ايت، كجادين اف؟

دي حق منڻ

جلانن امبيق دڪوت يريكو سمفي ڪا يروسليم فايه سبب ڪماراو، ڪيت برادو ماڪن اير دڪداي، لفس فد ايت ڪيت برجالن نائيڪ اتس بوڪيت سهيڻڪ نمفق ڪوت يروسليم جاءِ ۲۰. اد اورغ حق ترياق دغن سوڪ هاتي، فس اد جوڪ حق تورون لوتوت سوجود دغن حرمة، فس اد حق دوق مياپي لاکو فوجي ڪا توهن.

ڪيت برجالن ڪي سمفي ڪا رومه سئورغ واريس حق يوغيل، سموا فواق دي سمبوت ڪيت دغن سوڪ هاتي، لبيه ۲ لاکي دغن يوغيل، سبب يوغيل تائياس ماري دسيني. فواق دي چادغ مڪانن ڪا ڪيت. سوده ماڪن ڪيت فون تيدور سلالو. ايسوق فاڪي ڪيت باغون تيدور، تائمفق فق لوغ ده، بيني توان رومه حق نام ناعومي رويت ڪات، فق لوغ ڪي تمو دغن سائين ۲. فس امب دغن يوغيل اد ماس، ڪالو ڪيت براس نق ڪي ڪا مان ۲ فون بوليه. يوغيل ڪات: مق چي، امب نق ڪي ڪا تمفت حق فواق عسڪر فاڪو اورغ ساله. مق چي ناعومي ترڪجوت سيڪيت، تافي دي ڪات: بوليه، سبب لاني مو بسر ده، بوليه ڪي ايڪوت هاتي مو. تمفت ايت دوق دبوڪيت تڱورق. امب ڪات ڪا يوغيل: بائيڪ ڪيت ڪي ڪا بيت المقديس، يوغيل، مو فون تاهو بوڪن ڪات، عيسيٰ هيڊوف ڪليق ده، ڪالو ڪيت ڪي دسيتو، بڱڪالي ڪيت نق تمو دغن عيسيٰ.

تافي کيت کدوا کي کو، جالن هق مق چي، رویت فس
سمفي کا بوکيت تڱورق. اد اورغ توا سئورغ دوق مينتا
سدکه دسيتو. يوعيل ماسوق دکت اورغ ايت ځات: اورغ
تاروه مایت عیسی دمان؟ اورغ توا ايت چولب: اد اورغ
کاي سئورغ امبيق کي تاروه دقور، دالم کبون نون.

امب کات: کليق له يوعيل، تاءاد اف دسيني ده، کيت
کنا کليق سلالو، سبب سمفي ماس ماکن ناسي تغه هاري ده.
کيت فون کليق سلالو، فس با موليق سمو اورغ دوق ننتي
نق ماکن ناسي. يوعيل کات: مق چي، بياس تيغوق عیسی کا
دق؟ سمو دمیجا سيف، فس توان رومه کات: فق چي
بياس تيغوق عیسی تکه دي ناءیک هيمر، ماسوق دالم کوت
يروسليم. سمو اورغ کات عیسی جادي المسيح هق توهن
جنجي، فواق دي ملاؤغ سمبوت عیسی دغن سوک هاتي.
تافي لفس فد ايت سمیڱکو، دي ملاؤغ فول سوروه بونوه
عیسی. يوعيل تان: فس عیسی جادي المسيح که؟ سمو اورغ
سيف، فق لوغ کات: کالو عیسی جادي المسيح سوڱکوه، تنتو
فواق ايت تاءامبيق عیسی کي فاکو دکايو امفت چابځ. سمو
سيف فول، مق چي، اجق کيت کيچيق حال لاءين، فس تاءاد
سیاف سبوت چارا حال عیسی ده.

فد مالم ايت جوک، دتمفت تیدور، يوعيل کات کا
امب: نافي! اکو فيکیر سمو اورغ تاهو حال کورو عیسی،
تافي دي تاکوت تائبراني نق کيچيق، امب جواب: يوعيل،
ایسق کيت کنا کي جوال ایکن سفنځ هاري، جاغن لوف، مو

ماري دسيني انتوق جوال ايکن، بوکن حال لائين. يوعيل سيف، فس دي تيدور سلالو دکت ۲ امب. مالم ايت امب فون تيدور فس چندرا سلالو. فاکي ايسق، کيت توبيت کي جوال ايکن دکداي. اد اورغ هق ماري دبايق تمفت، دوق برجالن کي ماري دالم کوت يروسليم. افبيلا جوال هاييس ده، امب دغن يوعيل فون باوا^۱ اونتا کي ماکن اير، تغه ۲ دوق کي، يوعيل کات: اکو دوق فرهاتي سفنجغ هاري هارف نق بوليه تيغوق عيسي، تافي تائمفق. امب تان: کالو مو نمفق عيسي دالم اورغ رامي، مو نق کنل دي که؟ يوعيل جواب: ها تنتو، سيف ۲ فون کنل عيسي، سبب دي فيسيد فد اورغ لائين. امب تان لاکي: فيسيد بالس مان؟ يوعيل جواب: فايه نق هوراي، تافي اکو براس نق ماسوق دکت دغن دي سعمور.

افبيلا سمفي هاري راي، کيت سموا باغون فاکي ۲. يوعيل کنا کي دبیت المقديس دغن واري ۲ دي، سبب دي جادي انق اورغ يهودي. امب اد فلواغ بوليه کي کا مان ۲ فون، امب فون کي برجالن دکدي. تيبا ۲ بوپي سوارا ريبوت هق قوات. امب توروت اورغ رامي، هق فاکت هوغکل هادف کا تمفت هق بوپي سوارا فليق ايت. اغين هق قوات ايت، دوق اتس ساتو رومه. لفس فد ايت، اد اورغ بتينا، دغن اورغ جنتن سفاق تورون تغک ماري بلغ ۲ مپاي لاکو فوجي کا توهن دغن بهاس فليق ۲ هق امب تائباس دغر. فواق دي ملاوغ دغن سوارا درس کات: روح توهن تورون ماري ده! سروف هق ربي بياس جنجي کو^۲ نبي^۲ دولو. اد سئورغ دالم اورغ رامي کات: اورغ اين مابوق! تافي

سئورغ دالم فواق هق دوق اتس تشك جواب كات:
 دغرله فواق مو سئوما، بوكن فواق اكو اين مابوق، دق! اين
 بارو فوكول سميلن فائي، تنتو تاءاد سياف مابوق، تافي
 سموا فركارا هق جادي اين، توهن بري تاهو كا نبي يوييل
 لام ماري ده. عيسى هيدوف كليق ده! فس لاني دي دوق
 سبله كانن توهن، عيسى دياله جورو سلامت هق مائسي.

امب تائبراف تاهو حال جورو سلامت هق دي كات،
 تافي بيلاس دغر بينجامين رويت، اورغ يهودي دوق ننتي ۲ نق
 سمبوت المسيح، جورو سلامت هق توهن جنجي نق هنتر
 ماري. تافي لاني فواق دي بارو تاهو كات، عيسى له هق
 جادي المسيح ايت. دي ماري كا دنيا، تافي فواق ايت
 بونوه دي دكاو امفت چابغ، تافي دي بوليه منغ اتس
 كماتين، فس نائيك كليق كا تمفت توهن. امب تاهو تنتو
 فواق ايت نق براس ساليه، بردوسا، فس مستي كنا تريما
 حكومن هق بسر ايت. با اورغ رامي دغر بالس ايت، فواق
 دي فون ملاووغ دغن سديه هاتي كات: كيت كنا بوات بالس
 مان؟ تولووغ رويته كا كيت! اورغ ايت جواب: توبته باليق
 هاتي، فس تريما روكون مندي بفتيزما دغن نام عيسى
 المسيح، هق بوليه امفون دوسا مو، فس نق بوليه تريما رحمة
 درفد توهن.

افببلا دغر بالس ايت، فواق دي فون فاكت سوک هاتي،
 سروف اورغ جاهت هق كنا حكوم بونوه، تافي بوليه لفس
 بري سلامت. امب كهوور ۲ مپليت توبيت فد اورغ رامي،
 سبب خبر بايک اين، انتوق اورغ يهودي ساج، بوكن اورغ

لوار بڻسا سروف امب. امب برجالن بلڻ ۲ دوق فيڪير کات،
عيسی جادي جو رو سلامت هق اورڻ يهودي، فس امب نق
مينتا بري دي جادي جو رو سلامت هق امب بالس مان؟ سبب
امب بوکن اورڻ يهودي. تافي دي جوڻ تولوڻ ليریکا، اورڻ
هق ماسوق هنتو، ارتي هق مات بوت، سموا ايت بوکن اورڻ
يهودي. تافي امب تاهو، دي ماري نق تولوڻ اورڻ يهودي
هق جادي کتورونن نبي داؤد ساج. فرکارا اين بوات بري
امب مناڻيس دڻن سديه هاتي.

هيدوف چارا بارو

يوويل دغن واريس ۲ دي كليق باليق فتغ، نمفق سموا اورغ سنغ هاتي، سبب فواق دي تاهو دغن تنتو ده کات، عيسى هيدوق كليق، تافي تاءاد سياف براني کيچيق حال اين. بايق اورغ فاکت ماري تريما روکون مندي بفتيزما دغن اير، ترماسوق يوويل دغن واريس ۲ دي جوک.

مالم ايت، تغه ۲ کيت نق تيدور، امب تان يوويل: سبب اف اورغ هق فرچاي کا عيسى کنا تريما روکون مندي بفتيزما؟ يوويل جواب: هق ايت جادي تنداکات، جق دماس ايت کيت نق بوليه تريما هيدوق چارا بارو، هيدوق هق سوچي. امب تان لاکي: فس لاني مو تريما کا دق لاکي روح سوچي ايت؟ يوئيل جواب: ها اکو براس بالس ايت. امب تان: مو تاهو بالس مان يوويل؟ يوويل جواب: سبب لاني اکو تاسير بوهوغ، تاسير برچوري، تاسير بوات اف هق جادي دوسا، سموا فرکارا اين له، هق بري کيت تاهو کات، روح سوچي دوق بوات کرج دالم هاتي کيت.

نافي، اکو براس نق بري مو تريما عيسى سروف اکو جوک. امب کات: تنتو تائليه يوئيل، سبب اکو بوکن اورغ بغسا يهودي. تافي يوويل کات: عيه! دغر فيتروس دغن يحيى رويت کات، عيسى جوغ قربان پاوا دي انتوق سموا اورغ. امب کات: ها سوغکوه سموا اورغ، تافي سموا هق جادي اورغ يهودي ساج. يوويل کات لاکي: دق! بوکن بالس ايت! دي کات انتوق سموا اورغ سرات دنيا! امب فالیغ بلاکغ کا

يوecil، براس نق تيدور، فس تأسير دغر دي ده. تافي فد
 مالم ايت امب ميمفي نمفق ميقي، ليریکا فس ايني، فواق دي
 دوق لمبي تاغن فغکيل امب کليق. امب ترکجوت جاڪ دکت
 نق چره ده. تيغوق کوئينتو ناتغ نمفق چهيا متهاري دوق
 سولوه. امب باغون سيمفن ديرى بري سيف، سبب براس نق
 کليق سلالو.

افبيلا امب نمفق فق لوغ مندي سيف ده، امب فون کي
 کا تمفت فق لوغ فس کات: فق لوغ، امب براس نق کليق
 کا تمفت ميقي. بوليہ کا دق؟ فق لوغ کات: عيہ! کيت کنا
 دوق سيني امفت ليم هاري لاکي، تافي تافاله سبب فق لوغ
 فون بيمبغ کا سموا درومه مو جوک. فق لوغ هولور دويت
 دغن مکانن سيکيت کا امب. امب کادوه ۲ سيمفن بارغ،
 اوچف سلامت تيغکل دغن سموا اورغ، فس توييت کي سلالو.

جالنن جاءوه تافي تابراس لتيه، سبب هاري اين تافانس
 ساعت. امب تيدور برمالم دتفي جالن، فس هوبوغ برجالن
 کي لاکي، سهيغک سمفي کا نکري سماریا. امب کي دتلاک
 نق چيدق اير ماکن بري هيلغ دهاک فس دغر سوارا بودق
 جنتن کات: تلاک اين دالم، فس ميقي اکو تاروه بکس چيدق
 اين، انتوق سموا اورغ هق لالو کوئجالن اين.

فس دي تان امب کات: مو ماري دکوت يروسليم که؟
 امب جواب کا دي کات: ها اکو دوق بوات کرج دکاليل.
 دي تيغوق کا امب فس کات: مو بوکن اورغ يهودي که؟
 امب سپوم فس جواب کات: دق! اکو جادي اورغ سيريا.
 بودق ايت کات: ها سوغکوه، سبب تائياس اد اورغ يهودي

ماري برادو دسيني، سبب دي بنچي كا كيت. فس هاري اين مو نق برادو دمان؟ نق كي برادو درومه اكو كا دق؟ تنتو ميڦ اكو نق سوڪ هاتي بوليہ سمبوت مو، سبب ميڦ سوڪ دغر خبر هق ماري دڪوت يروسليم. امب اغڪوق كفلا فس برجالن توروت دي. با سمفي، دي فغڪيل ميڦ دي كات: ميڦ امب اد سائين ماري، بري دي برادو برمالم درومه كيت بوليہ كا دق؟ ميڦ بودق ايت جواب كات: دغن نام توهن، تنتو دي بوليہ برادو. ننتي سبتتر فس بوليہ ماكن سڪالي دغن كيت.

امب فرهاتي تيغوق اورغ بتينا ايت، نمفوق سروف تڪه دي مودا دي جاعق سوغڪوه ٢٠، كيچيق لمه لمبوت، مات هق سنغ. امب تائمفوق اد اورغ جنتن لائين لائي، ملينكن انق دي ساج، بغڪالي اورغ بتينا اين تاءاد لائي. دي اجق امب ماري ماكن سڪالي دغن كلوارڪ دي فس تان امب: اد خبر اف ديروسليم كا دق؟ امب دوق ديام تاءاهو نق رويت هق مان دولو. اورغ بتينا كات: عيسى المسيح، جورو سلامت كيت، هق فواق ايت امبيق كي بونوه، دغر كات هيدوف كليق ده. اد سياف بوليہ تيغوق كاتيق؟ امب براس شك هاتي اتس دي سوغڪوه، هق نق ٢ تاهو حال عيسى ساعت. امب فون رويت سموا فركارا بري دي دغر. لفس فد ايت دي كات: اوه سوغڪوه دي هيدوف كليق ده، اكو تاهو. كيت سموا تاهو دغن تنتو كات، عيسى جادي اير هق يغ هيدوف، فس اير ايت نق منيليہ كي سرات دنيا. امب جواب كات: دق له كائون، تاءسمفي كا سرات دنيا، نق جادي هق اورغ يهودي

ساج، سبب عیسی جادي جوړو سلامت هق اورغ يهودي. اورغ بتینا ایت سوک با دغر امب کیچیق، فس کات: انتوق اورغ يهودي ساج که؟ بوکن بالس ایت ادیق، سبب عیسی سندیري هق رویت حال این کا کائون. ادیق تاهو کا دق، عیسی ماري جائوه، ماري چاري اورغ بردوسا سروف کائون. امب براس ترکجوت دغن هق دي رویت، فس تان دي: کالو بالس ایت، کائون بیاس تیغوق عیسی ده که؟ اورغ بتینا ایت جواب کات: بوکن بیاس تیغوق دي ساج دق، دي بیاس ماري برادو درومه کیت دوا هاري، دوا مالم، فواق صحابة ۲ تاءاد سیاف براني کات اف.

لفس دي رویت دي فون سوک. فس دي تیغوق کا امب، کات: بایک کائون رویت چارا حال کائون بري ادیق دغر، بغکالي نق تولوغ بري ادیق بولیه کنل دغن عیسی جوک. مق فق هق کائون ماتي. جق دکائون کچیق لاکي، کائون کنا کرج سارا دیري.

بوات کرج سموا فرکارا، سموا اورغ کات کائون جاعق، فس سبب کائون جاعق اینیله بوات بري کائون سست جالن. دي برادو کیچیق سبنتر. ماس ایت دکت نق کلف ده، انق جنتن هق دي فون باغون توبیت کي هیریت لمبو ۲ ماسوق دالم کندغ. اورغ بتینا ایت هوبوغ رویت حال دیري دي لاکي: فواق اورغ جنتن هاتي جاهت امبیق توبوه کائون این بوات ایکوت سوک دي، چاري لاب اتس توبوه کائون. لفس فد ایت دي تیغکل کائون کي. ماس ایت کائون لکت فروت فس برانق بولیه انق جنتن، انق هق کائون سائي ایت، کائون

برانق تافي نق چاري فق كا انق تائيه. كالمو نق توروت عادة
 هق نبي موسى، مستي كائون كنا حكوم سمفي كا ماتي. تافي
 موجور سبب ماس ايت، كائون دوق كرج دغن اورغ كاي،
 فس سموا اورغ حرمة كا دي. بالس ايت له كائون دغن انق
 بوليه سلامت.

تافي سموا اورغ دوق بنجي، دوق هينا كا كائون لائي،
 تاءاد سياف فادول كا كائون، فس كائون سنديري فون تاءاد
 فادول كا اورغ جوڪ. جادي ساتو هاري كائون توبيت ڪي
 چيدق اير فرياغ تغه هاري، تڪه تاءاد سياف ماري، فس كائون
 تمو دغن دي دسيئو. امب تان: تمو دغن سياف كائون؟
 اورغ بتينا ايت جواب ڪات: كائون تمو دغن عيسى
 المسيح، جو رو سلامت هق سموا اورغ. دي ماري دتلاڪ
 مينتاء اير نق ماڪن، لفس ايت دي رويت چارا حال اير هق
 هيدوف بري كائون دغر، دي ڪات كالمو كائون بوليه تريما
 هق يڄ هيدوف ايت، كائون تاءڪنا لافر سلام ۲.

امب دوق ديام، براس تاءبراف فهم هق دي رويت ايت.
 امب تان دغن سوارا ڪهور ۲ ڪات: مقصود ايت بالس مان امب
 تافهم؟ اورغ بتينا ايت سپوم فس ڪات: مولا ۲ كائون فون
 تاءاهو جوڪ، تافي براس نق. لفس فد ايت عيسى سوروه
 كائون باؤوا ڪي تمو دغن لائي هق كائون. كائون فون بوهوڄ
 ڪا دي ڪات، كائون بوجڄ تاءاد لائي. تافي اديق تاهو ڪا
 دق، عيسى تاهو سموا فرڪارا هق كائون جادي اورغ بردوسا،
 تافي دي دوق ڪسياڄ بلس ڪا كائون لائي. امب تان: فس
 دي تاهو دغن چرف بالس مان؟ اورغ بتينا ايت جواب: تنتو

دي تاهو، سبب دي يغ مهاتاهو. امب تان لاکي: فس کائون
بوات بالس مان؟ دي جواب: کائون تان چارا حال المسيح،
فس دي رويت کات، دي سنديريله حق جادي المسيح. ماس
ايت کائون فرچاي کات عيسى جادي المسيح سوغکوه^۲.
لفس ايت کائون هوغکل کي کا کدای سلالو، فس رويت
سموا فرکارا اين بري سمو اورغ دغر.

امب دوق ديام، دوق فيکير چارا حال اين، براس کورغ
فهم حق دي رويت ايت. دي رويت سيکيت لاکي کات:
عيسى جادي اير حق يغ هيدوف، فس دي بري کائون
سنديري ماکن اير يغ هيدوف ايت، سروف بوليه کهيدوفن
يغ بارو. لاني کائون دوق دغن سنغ هاتي دغن انق حق
کائون دسيني. فس اديق، اديق کنا مڱاکو دوسا دائفن توهن
دولو، لفس ايت باليق هاتي سمولا، سبب عيسى تائبري اير
حق يغ هيدوف ايت کا اورغ حق تاء مڱاکو کات دي اورغ
بردوسا.

لفس سود کيچيق، انق جتنن حق اورغ بتينا فون ماسوق
ماري، فواق دي سيمفن تمفت تيدور کا امب، لفس ايت
امب فون جندرا سلالو سبب لتيه دغن جالنن حق جائوه.
ايسق فاکي امب باغون فاکي^۲ سبب نق برجالن بري سمفي
درومه باغت^۲. اورغ بتينا ايت سيمفن بارغ ماکن انتوق امب
بري ماکن تغه جالن. لفس ايت امب اوچف سلامت
تيغکل دغن دوا برانق ايت، فس تيغکل کي.

تافي تغه ۲ دوق برجالن ايت امب تاليه لوف فركتائن
 هق يوعيل هق کات: عیسی قربان پاوا انتوق سموا اورغ،
 فس فرکتائن هق اورغ بتینا سماریا کات: ادیق کنا مگاكو
 دوسا دافن توهن دولو. با فیکیر بالس ایت، بارو امب فاهم
 کات، هق هاتي امب دوق جاوه فد عیسی ایت، بوکن دغن
 سبب بغسا اتو اوکام هق امب دوق فکغ دق! تافي دغن
 سبب امب اد دوسا.

هق جاهت توکر جادي مولیق

امب هوبوغ برجالن لاکي لیم هاري، بارو سمفي کا کمفوغ هق امب. لاني امب تائاکوت اورغ نق شک هاتي کا امب حال فراهو حیرام هق باکر ایت. فس کالو اورغ شک هاتي اتس امب سوغکوه، تنتو میق کنا هنتر خبر کا امب.

امب برجالن سمفي کا رومه، ماس ایت سماو اورغ دوق تیدور. با فواق دي تاهو کات امب، دي فون فاکت باغون تریما امب کلیق دغن سوک هاتي. میق کادوه ۲۰ سیمفن بارغ بري امب ماکن، اد روتي دغن تلور رندغ فس سوسو سکلس. امب ماکن سوده، امب فون توبیت کي دوق دلوار. میق دغن لیریکا دوق تیغوق مات مو اکو بابق کالي، تنتو اد اف هق فواق دي نق رویت کا امب، تافي امب براس لتيه ساعت، امب فون ماسوق تیدور سلالو.

فاکي ایسق، تکه لیریکا دغن ائینی کي چیدق ایر، میق ماسوق کیچیق دغن امب، دتاغن اد سچاتوغ کائین هق دوق بوغکوس. امب تان میق کات: عیه اف ایت میق؟ میق ماسوق دکت، سپوم کا امب فس کات: نافي، لیریکا دي برتونغ ده. امب سپوم کا میق جوک فس کات: ها مولیق، سبب لیریکا دي چومیل. فس تونغ هق دي ایت سیاف دي، فس بالس مان بولیه تمو دغن لیریکا؟ میق جواب: دي جادي اورغ کاي، ادیق توان سائرین. توان سائرین کاسیه کا ائینی، فس دي اوفه بري ائینی کي مغازوه انق هق دي ایت. فد ساتو هاري لیریکا فون کي جوک، فس تمو دغن لیریکا دسیتو. امب تان

ميق: فس دي كيچيق اف دغن ليريكا كا دق؟ ميڤ جواب: دق، دي تاڻ توان سائيرين حال ليريكا، فس توان سائيرين فون هاتي بائيك كيچيق موليق، تاهينا كات كيت ميسكين. سود سكالې توان سائيرين ماري مينتا ليريكا دغن ميڤ، دي كات نق منيكاڅ لفس فرياغ كوټيب بواه ارا.

امب تاڻ ميڤ: فس ليريكا سځكوف نق منيكاڅ دغن دي كا دق؟ ميڤ جواب: ها دي ستوجو، سبب دي عمور انم بلس تاهون ده. اورغ جنتن ايت فون اورغ هاتي موليق جوځ. فس بيلا منيكاڅ ده، دي تاځنا كي دوق جاوه فد كيت. امب كات كا ميڤ: امب سوځ هاتي دغن دي جوځ، فس بلنجا ايت بايق مان؟ ميڤ جواب: نافي، ميڤ بياس بوات ساله كا مو دولو، ميڤ جوال فراهو، انتوق نق فراوبت ليريكا، فس لاني ميڤ نق بري كليق سمو ايت. ميڤ تاروه دويت بلنجا هق ليريكا، نق بري مو بوليه بلي فراهو كليق. امب دوق ديام براس مالو جوځ، سبب امب تاهو امب سنديري فون ساله هق تيځكل بري ميڤ دوق سوسه. امب جواب: بلر له ميڤ، بځكالي حيرام تاسير جوال كليق فراهو كيت ايت.

ميڤ كات: تاڻتنو جوځ نافي، سبب لاني فراهو هق دي تيځكل سبواه ساج، دولو فراهو هق دي كنا باكر هاييس دوا بواه. امب براس تركجوت سوځكوه بيلا دغر هق ميڤ رويت، سبب كالو دوا بواه، بځكالي باجو هق امب فون نق كنا باكر جوځ. امب تاڻ: دوا بواه كه ميڤ؟ ميڤ جواب: ها دوا بواه، فس لاني تيځكل سبواه ساج هق بوليه بوات كرج. لاني دي

سٺاڪيت. هبب ڪاڪي دي فاته، فس بڻڪالي دي تائيه توبييت
 ڪلاوت ده. امب تريما چاتوڻ دويت ايت دميڻ، فس توبييت
 ڪي ڪلوار. امب ترايغت ڪا فرڪتائ هق ڪات: «باليق له
 هاڻي مو، تريما روڪون مندي بفتيزما، فس توهن
 نق امفون دوسا مو، فس مو نق تريما روح سوچي
 هق توهن»

امب ڪنا مڱاڪو ساله دولو، فس باليق هاڻي. دولو امب
 تائمنفڻ جالن هق نق بري لفس فد ڪسلاهن ايت، تافي لاني
 امب تاهو دغن چرف ده. فس ڪالو امب ڪرات سين نق
 بائيڪي، امب ڪنا باليق هاڻي، يائيت امب ڪنا مڱاڪو ساله ڪا
 حيرام.

امب دوق سٿورڻ دفنتي. دالم هاڻي براس بنچي ڪا دوسا
 هق دوق اد دالم هاڻي، بنچي ڪا ديري سنديري، بنچي ڪا
 حيرام. امب برجالن ڪليق ڪا رومه، ايني تاء، ميڻ دغن
 ليريڪا دوق تنون ڪائين. امب ماسوق دڪت فس رويت چارا
 حال عيسيٰ هق امب تاهو ڪات: مولا ۲ فواق دي تاء تاهو
 ڪات عيسيٰ جادي المسيح هق فواق دي دوق ننڻي ايت،
 سبب ايت فواق دي فاڪت بونوه عيسيٰ، تافي توهن بوڪ
 فلواڻ ڪا فواق دي، دغن بري عيسيٰ ڪليق ماري سڪالي لاکي
 ڪو روح سوچي. فس بري سموا اورڻ بوليھ تريما بفتيزما
 دغن اير، جادي تنڊا ڪات توهن امفون ده دوسا دي. تافي
 سايڻ، عيسيٰ جادي جوړو سلامت هق اورڻ يهودي ساج. ميڻ
 سپوم فس ڪات: ها سوڻڪوه عيسيٰ جادي المسيح هق اورڻ
 يهودي، تافي دي جادي جوړو سلامت هق اورڻ سرات دنيا.

فس دي بوليه فرينته ددالم هاتي مائسي. تافي هق كيت كنا بوات لاني، يائيت كيت كنا مڱاكو ساله دولو. امب ستوجو دغن فيكيران ميڱ، بڱكالي امب كنا ڪي مڱاكو دغن حيرام، رويت سموا فرڪارا هق امب بوات دغن فراهو دي ايت. فيكير بالس ايت امب فون توبيت ڪي ڪا رومه حيرام سلالو. با سمفي، امب ڪرتوق فينتو. حيرام ملاؤغ ڪات: سياف دي ايت؟ امب براس تاڪوت سيڪيت، تافي ڪاچڱ ماسوق ڪي جوڪ. با حيرام نمفق امب دي ڪات: مو ماري بوات اف؟ امب هوندور سيڪيت فس ڪات: اڪو له هق باڪر فراهو ايت، تافي اڪو ڪليق ماري نق مڱاكو ساله، فس باوا دويت ماري نق باير هرڪ فراهو ايت جوڪ. حيرام، اڪو ميتتاء معاف.

بيلا حيرام دغر هق امب رويت، دي فون براس نائيڪ موريه سلالو، ملاؤغ ڪات: اوه! مو ڪه هق باڪر فراهو ڪو! اڪو نق ايڪت مو ڪي نائيڪ حاڪيم، ننتي له نافي! اڪو نق بالس جاهت ڪليق ڪا مو. تافي امب چمفق دويت اتس ريبا دي. حيرام ڪات: مو ڪي چوري دويت هق سياف باپق سروف اين؟ امب فالڱجواب ڪا دي ڪات: دويت ايت جادي دويت بلنجا ڪاؤن ڪو، سڪت ايت ساج هق اڪو نق ڪيچيق حيرام، سلامت تيڱڪل. تافي حيرام فڱڪيل امب ڪات: ننتي دولو جاغن ڪادوه ڪي! سبب اف مو باوا ماري دويت ڪا اڪو؟ امب جواب: سبب اڪو تائسير بوات دوسا لاڪي، جق دهاري اين اڪو نق هيڊوف چارا بارو، هيڊوف هق سوچي. سود ڪيچيق امب فون توبيت ڪي سلالو.

امب بوات ده سڪت هق امب فهم، يائيت باليق هاتي،

مڱاڪو ساله دغن حيرام، فس باير دويت هرڪ فراهو هق دي ايت. لفس فد اين جادي ڪرج هق عيسى فول. ڪالو عيسى نق ماري چاري امب، بائڪ دي ماري لاني، امب دوق ننڍي دتفي فنتي لام جوڪ، امب نق ڪا روح سوچي، نق بوليھ مياپي لاڪو فوجي ڪا توهن دغن بهاس هق فليق سروف هق فواق صحابه ۲ دوق بوات. امب بردعا مينتا عيسى ماري دوق دغن امب ماس اين. سود بردوعا امب دوق ديام، ننڍي نق تيغوق فرڪارا عجائب تافي تاء اف سڪارا هق فليق.

امب لڱڪ ڪا لاغيت، سبنتر امب ترڪمبر نمفق اد ساتو بيليق هق ڪلف. دالم بيليق ايت، اد سئورغ دوق تيدور. دي جادي اورغ هق جاهت، فس فرڪارا جاهت ايت فون بوات بري دي ٽاڪوت. امب دوق تيغوق ڪا دي دغن براس ڪسياغ سوغڪوه ۲. سبنتر امب دغر بويي سوارا هق ڪات: «ڪليق ڪي چاري دي لاني سلالو». امب فون باغون فس برجالن ڪي ڪا ڪڍاي سروف اورغ هق ميمفي. امب بلي بواه ڪايو دغن اير بواه جابيت سجبول، ڪي ڪا رومه حيرام سلالو.

افبيللا سمفي درومه حيرام، امب ماسوق دالم رومه دي، دغن تاء ڪرتوق فينتو. امب ماسوق دڪت دي، لتق بارغ ۲ هق بلي انتوق دي فس ڪات: اڪو ڪيچيق دغن سوغڪوه هاتي حيرام، اڪو ڪسياغ بلس سوغڪوه ڪا مو هق ڪنا ساڪيت بلس اين، مو اد اف هق نق بري اڪو تولوغ ڪا دق؟ حيرام تيغوق ڪا امب، فس ڪات: اڪو، اڪو، لاني اڪو دوق فيڪير ڪات، مو، مو نق بوليھ ڪلاوت سنديري ڪا دق، بائڪ مو چوب چاري اورغ ماري تولوغ بوليھ امفت ليم اورغ. اڪو فيڪير

بائيڪ مو بوات ڪرج اين، سبب لاني اڪو دوق ساڪيت.

سود هق حيرام ڪيچيڪ، بوات بري امب براس سوڪ
هاتي، سبب هق حيرام ڪيچيڪ ايت، بري امب تاهو ڪات، دي
معاف ڪا امب ده، فس دي دوق اجق بري امب ڪرج دغن
فراهو دي، هق بياس جادي فراهو ايه، امب جواب ڪا حيرام
ڪات: ها تنتو بوليه، مالم اين اڪو نق ڪي تيغوق سموا فرڪارا
هق ڪيت ڪنا چادغ، چاري اورغ هق بوليه ڪرج دغن ڪيت.
فس ايسق اڪو نق توييت ڪلاوت سلالو، فس بيلا ڪيت جوال
ايڪن بوليه ده، ڪيت نق بهاکي دويت دغن مو بري سام باپق.
ماس ايت، امب براس ڪاسيه فس ڪسياغ بلس ڪا حيرام
سوڳڪوه ۲۰. سروف دغن عيسيٰ، جوورو سلامت هق امب دوق
ڪاسيه، ڪسياغ بلس ڪا امب، فس امفون دوسا هق امب ده.

لاني امب تاهو ڪات رتي هق بياس ماري جادي مائسي،
دي هق بوليه منغ اتس حڪوم ماتي، فس اتس سموا ڪواس.
دي ماري مرينته دالم هاتي مائسي، فس دالم هاتي هق امب
جوڪ. امب سدر ڪات جق دماس اين توهن دوق فرينته ده
ددالم هاتي امب.

- تمت -